

**ЗӨВШӨӨРЛИЙН ТУХАЙ ХУУЛЬД НЭМЭЛТ, ӨӨРЧЛӨЛТ ОРУУЛАХ ТУХАЙ
ХУУЛИЙН ТӨСӨЛ БОЛОН ХАМТ ӨРГӨН МЭДҮҮЛСЭН ХУУЛИЙН
ТӨСЛҮҮДИЙГ ХЭЛЭЛЦЭХ ЭСЭХ ТАЛААРХ ЭДИЙН ЗАСГИЙН БАЙНГЫН
ХОРООНЫ САНАЛ, ДҮГНЭЛТ**

2025 оны 12 дугаар
сарын 23-ны өдөр

Улаанбаатар
хот

Илтгэгч нь: Улсын Их Хурлын гишүүн Г.Очирбат

Улсын Их Хурлын дарга, эрхэм гишүүд ээ,

Монгол Улсын Их Хурлын гишүүн Н.Учрал, Х.Ганхуяг, Б.Заяабал нараас 2025 оны 12 дугаар сарын 17-ны өдөр Улсын Их Хуралд өргөн мэдүүлсэн Зөвшөөрлийн тухай хуульд нэмэлт, өөрчлөлт оруулах тухай хуулийн төсөл болон холбогдох бусад хуульд нэмэлт, өөрчлөлт оруулах тухай хуулийн төслүүдийг үзэл баримтлалын хүрээнд хэлэлцэх эсэх асуудлыг Эдийн засгийн байнгын хороо 2025 оны 12 дугаар сарын 23-ны өдрийн хуралдаанаараа хэлэлцлээ.

Хууль санаачлагч нь олон улсад хэрэглэгдэж байгаа мэдэгдлээр эрхлэх үйл ажиллагааны талаарх зохицуулалтыг бий болгох, зарим төрлийн тусгай болон энгийн зөвшөөрлийг мэдэгдэл хүргүүлсний үндсэн дээр эрхлэх, тусгай зөвшөөрлийн төрөл ангиллыг дахин тодорхойлох, нэр томъёог жигдлэн хуульчлах, тодорхой төрлийн зөвшөөрөл олгох процессын журмыг салбарын хуулиудад тусгах, зөвшөөрөл эзэмшигчид тавих явцын хяналт, цахимжилтыг сайжруулах замаар Зөвшөөрлийн тухай хуульд нийцээгүй захиргааны хэм хэмжээний акт, журмаар зөвшөөрлийн харилцааг зохицуулан зөвшөөрөл олголтын процессыг хүндрүүлж байгаа нөхцөлийг арилгаж, хүнд суртал, авлига, ашиг сонирхлын зөрчил үүсгэх нөхцөлөөс урьдчилан сэргийлэх, хуульд заасан хугацаанд иргэн, аж ахуйн нэгж, байгууллага түргэн шуурхай, хүндрэл чирэгдэлгүй зөвшөөрөл авах нөхцөлийг бүрдүүлэх зорилгоор Зөвшөөрлийн тухай хуульд нэмэлт, өөрчлөлт оруулах тухай хуулийн төсөл болон холбогдох бусад нэмэлт, өөрчлөлт оруулах тухай хуулийн төслийг боловсруулжээ.

Хуулийн төслүүдийг d.parliament.mn цахим сайтад байршуулж иргэд, олон нийтийн саналыг авч байна.

Эдийн засгийн байнгын хорооны хуралдаанаар хуулийн төслүүдийг хэлэлцэх үед Улсын Их Хурлын гишүүн Л.Соронзонболд Зөвшөөрлийн хуулийг дагалдуулан үндэслэлгүйгээр дүрэм, журам баталж хүнд суртал, ашиг сонирхлын зөрчил үүсгэдэг байдлыг энэ хуулийн нэмэлт, өөрчлөлтөөр хэрхэн хязгаарлах, мөн тухайн салбартаа монопол байдалтай аж ахуйн нэгжүүдийн тусгай зөвшөөрлийг тэдгээрт давуу байдал олгохгүй байхаар хэрхэн зохицуулж шударга өрсөлдөөн бий болгох талаар, Улсын Их Хурлын гишүүн Г.Очирбат Зөвшөөрлийн хууль болон түүнийг дагасан олон тооны дүрэм, журам, хэм хэмжээний актууд болон одоо мөрдөгдөж байгаа стандартууд нь нийгмийн харилцаагаа бүрэн зохицуулж чадаж байгаа эсэх талаар, Улсын Их Хурлын гишүүн Д.Үүрийнтуяа төрийн захиргааны төв байгууллагууд зөвшөөрөл олгоод, өөрөө гүйцэтгэлд нь хяналт тавьдаг байдал зохистой эсэх талаар, мөн нэг үйл ажиллагаа эрхлэхийн тулд хэд хэдэн байгууллагаас тусгай зөвшөөрөл авч, олон шат дамжлага дамжин хугацаа

алддаг байдлыг хэрхэн сайжруулах талаар, Улсын Их Хурлын гишүүн Ж.Алдаржавхлан тусгай зөвшөөрөл олгодог боловч гүйцэтгэлд нь хяналт тавьдаггүй, үүрэг, хариуцлага хүлээдэггүй байгууллагуудын уялдааг хэрхэн хангуулах талаар тус тус асуулт асууж, хариулт авлаа.

Мөн Улсын Их Хурлын гишүүн Г.Очирбат тусгай зөвшөөрөл олгогч байгууллагууд аж ахуйн нэгж, бизнес эрхлэгчдээ дэмжиж, хуулийг хэрэгжүүлэхдээ хүнд суртал, ашиг сонирхлоос ангид байх талаар, Улсын Их Хурлын гишүүн Ч.Анар хяналт, ил тод байдлыг сайжруулах чиглэлээр мэргэжлийн холбоодод тусгай зөвшөөрөл олгох эрхийг үе шаттайгаар шилжүүлж байгаа боловч, хамаарал бүхий аж ахуйн нэгжүүд өөрсдөө мэргэжлийн холбоо байгуулаад, түүгээрээ дамжуулан давуу байдал бий болгох, шударга өрсөлдөөнийг хааж хүнд суртал, ашиг сонирхлын зөрчил үүсгэж байгааг анхаарах, ийм сөрөг үзэгдлийг таслан зогсоох талаар, Улсын Их Хурлын гишүүн Р.Сэддорж энэ хуулийн төслүүд батлагдахдаа иргэд, бичил, жижиг, дунд үйлдвэрлэл, үйлчилгээ эрхлэгчдийн эрх ашигт нэн тэргүүнд нийцсэн, тэдэнд хүндрэл, дарамт учруулахгүй зохицуулалттай байх нь зүйтэй талаар тус тус санал хэллээ.

Байнгын хорооны хуралдаанаар Монгол Улсын Их Хурлын чуулганы хуралдааны дэгийн тухай хуулийн 35 дугаар зүйлийн 35.11-т заасны дагуу Зөвшөөрлийн тухай хуульд нэмэлт, өөрчлөлт оруулах тухай хуулийн төсөл болон хамт өргөн мэдүүлсэн хуулийн төсөл тус бүрийг үзэл баримтлалын хүрээнд хэлэлцэхийг дэмжих эсэх асуудлаар санал хураалт явуулахад, Зөвшөөрлийн тухай хуульд нэмэлт, өөрчлөлт оруулах тухай хуулийн төслийг хуралдаанд оролцсон гишүүдийн олонх буюу 70.6 хувь нь дэмжсэн бөгөөд хамт өргөн мэдүүлсэн бусад хуулийн төслүүдийг үзэл баримтлалын хүрээнд хэлэлцэхийг мөн дэмжсэн болно.

Байнгын хорооны санал хураалтын явцад хуулийн төслийн хамт өргөн мэдүүлсэн Виртуал хөрөнгийн үйлчилгээ үзүүлэгчийн тухай хуульд нэмэлт, өөрчлөлт оруулах тухай хуулийн төслийг хуралдаанд оролцсон гишүүдийн олонх дэмжээгүй болно.

Улсын Их Хурлын эрхэм гишүүд ээ,

Зөвшөөрлийн тухай хуульд нэмэлт, өөрчлөлт оруулах тухай хуулийн төсөл болон хамт өргөн мэдүүлсэн бусад хуульд нэмэлт, өөрчлөлт оруулах тухай хуулийн төслүүдийг үзэл баримтлалын хүрээнд хэлэлцэх эсэх талаарх Эдийн засгийн байнгын хорооны санал, дүгнэлтийг хэлэлцэн шийдвэрлэж өгөхийг Та бүхнээс хүсье.

Анхаарал тавьсанд баярлалаа.

**ЭДИЙН ЗАСГИЙН БАЙНГЫН
ХОРООНЫ ДАРГА**



Р.СЭДДОРЖ